

四庫全書

子部

欽定四庫全書

古今事文類聚後集卷四十九

宋 祝穆 撰

蟲豸部

蟻

羣書要語大螳俗呼為馬蚍蜉小螳齊人呼為蟻蚌飛

螳有翅其子蚍注蟻卵

爾雅

蟻為玄駒

大戴禮注

牛亨問蟻為

玄駒者何答曰河內人見馬數十萬騎皆大如黍米遨

遊往來從朝至暮家人以火燒之人皆成蚊蚋馬皆成

大蟻故今人呼蚊蚋曰黍民蟻曰玄駒古今注有黑黃大

小數種之蟻廣志饋食其豆蜃蛤蟻也子醢周禮蟻子時術之

注蟻蚍蜉也微蟲爾時術其功巧大埵也學記南方赤蟻

若象楚辭蟻慕羶莊子道在螻蟻同上千丈之堤以蟻穴而壞

韓蟻封穴戶大雨將集焦贛易林蟻有無弱之智抱朴子鯨鯢

吐舌蟻附之因吞之又開鱗甲使蟻入其中乃奮迅則

舐取之楊孚異物志

詩句行蟻上枯梨

杜

蟻壤漏成河

鮑明遠

白蟻戰酣山雨

來

錢昭度

古今事實

蟻壤得泉

齊桓公伐孤竹山中無水隲朋曰蟻冬居山之陽夏居

山之陰蟻壤寸而有水乃掘地遂得水

韓子

羣蟻觀鼃

見鼃門

殺蟻得禍

桓譙字敬祖太元中忽有人皆長寸餘悉被鎧持槩緣
機登竈尋飲食之所或有切肉以槩刺取徑入穴蔣山
道士朱應子以沸湯澆所入處寂不復出因掘之有斛
許大蟻死在穴中譙後以門囂同滅

劉敬叔
異苑

牀下蟻鬪

見耳門

救蟻得報

董昭之過江見蟻胃一短蘆昭之救之後繫獄蟻領羣

蟻穴獄昭之遂得免

東陽元疑
齊諧記

黑赤交鬪

後魏顯宗時兗州有黑蟻與赤蟻交鬪長六十步廣四寸赤蟻斷頭而死東魏孝靜時鄴下有黃蟻與黑蟻鬪

五行紀

皇帝避蟻

哲宗朝程頤為崇政殿說書頤聞帝在宮中盥而避蟻因畢講請曰有是乎上曰然誠恐傷之耳頤曰推此心以及四海帝王之要道也上稱善

編竹渡蟻

二宋少時有胡僧曰小宋他日魁天下大宋亦不失甲
科後十年僧驚問大宋曰公丰神頓異如能活數千萬
人之命者試思之宋曰堂下比有蟻穴為暴雨所侵羣
蟻繚繞穴傍吾戲編竹橋以渡之耳僧曰是也小宋今
年首捷公終不出其下比唱第小宋果中魁選章聖臨
朝謂弟不可先兄乃以大宋為第一

恐踐行蟻

徐節孝先生自少戒殺見聚蟻惕然惟恐踐之

行狀

古今文集

雜著

蚍蜉賦

并序

李德裕

此郡多蚍蜉所居臨流實繁其類或聚於枉席或入於盤盂終日厭苦而不知可禦之術因戲為此賦令稚子燧和之

惟江潭之下國况幽居於澤畔何螻蟻之微物亦有徒

而凌亂或泮散於經笥或寅緣於食案予乃戲而問之
曰爾能居厚地而漏江河無乃處吾身而為大患蟻不
能言辭以意宣其旨曰我稟形於造化亦一氣之所甄
嘗濟齊師之乏亦聞媯德之羶觀封穴而知雨驗寸壤
而得泉出以時而不息故學者得而稱焉戴粒而遊若
巨鼃之冠神嶽繞磨而行若日月之麗清天若乃依垤
緣壁淫淫奕奕其聚無聲其行無迹值晏溫而出遊當
祁寒而入隙迅雷作而不駭微雨灑而自適生雖瑣細

亦有行藏止若羣羊之聚進如旅雁之翔乘其便也雖
鱣鯨之可制無其勢也雖蛭蟥而不傷今願悔過戢於
垣牆豈同青蠅之點白汙君子之衣裳

律詩

禽蟲一章

白居易

蟻王化飯為臣妾螺母偷蟲作子孫彼此易名非本物
其間何怨復何恩

觀蟻

楊廷秀

偶爾相逢試問途不知何事數遷居微軀所饌能多少
一獵歸來滿後車一騎初來隻又雙全軍突出陣成
行策勲急報千夫長渡水還爭一葦航

蠅

羣書要語其類有蒼者聲雄壯負金者聲清聒其聲在
翼身青者能敗物巨者頭如火

酉陽雜俎

匪雞則鳴蒼蠅之

聲

齊風

蒼蠅之飛不過十步自託騏驥之尾乃騰千里之

路

光武與隗囂書

或問蒼蠅紅紫注似朱而非朱也

楊子

青蠅嗜

肉汁而忘溺死衆人貪世利而陷罪禍

班固
難莊

詩句穴紙出飛蠅

坡

名譽過耳如蒼蠅

歐

知登夏畦觀

耘耔汗顏炙背棲蒼蠅

山谷

古今事實

青蠅刺讒

青蠅大夫刺幽王也營營青蠅止於樊豈弟君子無信
讒言營營青蠅止於棘讒人罔極交亂四國營營青蠅
止於榛讒人罔極構我二人

暴屍驅蠅

楊章為杜喬李固薦為平原令後喬固被刑章行赴洛

見喬固暴屍驅逐蠅蟲

東觀漢記

青蠅驗腦

章遵為揚州刺史行部聞道旁女子哭聲甚哀問之云夫遭難死遵敕吏輿屍到令人守屍曰當有物自往吏白有蠅聚頭所遵令披視得鐵錐貫腦考問以淫殺夫

益部者

舊傳

怒蠅棄筆

見禍急門

誤筆成蠅

見畫門

青蠅弔客

見弔慰門

青蠅報赦

見赦門

食中有蠅

見庖竈門

杖閣放蠅

庫狄伏居室患蠅杖門者曰何故放入

北史

食菰蠅集

武儒衡時元稹倚宦官知制誥儒衡厭鄙之會食於蠅
集其上儒衡揮以扇曰適從何來遽集於此一坐皆失
色

拂蠅觸睫

段成式讀書有蠅觸睫隱字偶拂殺一蠅翼似蜩冠似

蜂

帖六

號凍蠅

王方慶體質鄙陋言詞魯鈍為鳳閣侍郎張元一謂之

被凍蠅

朝野
僉載

古今文集

雜著

罵青蠅文

張復之

火帝降炎臣興邈矣六合歆然如烝萬物長羸如騰如
凌不可謝其玄造不可名其至能忽陰薄陽化生此青
蠅觸類冉冉朋飛薨薨切羶而蠹芳莛預登當是之際
無人不憎我疑奸人之魂佞人之魄埋鬱不散託蠅寄

跡不然者何以變白為黑變黑為白所以恣其點染所以遂其譏慝奸佞之作敗君之德黑白之變為物之賊所謂欲蓋而彰順非而澤使潔者不得自明玄者不得自默連璧失珍無金奪色致義士之感心幾撫髀而太息衆君子矯而議曰天運地施融融蚩蚩何者不有生不宜信妍醜以自任亦浩混乎無知蠅斯眇末胡足罵為殊不知天地不言假乎仁者持準操柱以上化下使惡不黷善真不類假廓唐堯之雍熙稱周王之風雅

防邪之萌雖小不捨厚汚若成悔何及也於是連呼童
奴疾致如意當案輟食對客攘臂指西風而罵曰未斷
爾祖終惡爾類營營乎青蠅止於藩

憎蒼蠅賦

歐陽永叔

蒼蠅蒼蠅吾嗟爾之為生既無蜂蠆之毒尾又無蚊蟲
之利嘴幸不為人之畏胡不為人之喜爾形至眇爾欲
易盈杯盂殘瀝砧几餘腥所希杪忽過則難勝苦何求
而不足乃終日而營營逐氣尋香無處不到頃刻而集

誰相告報其在物也雖微其為害也至要若乃華棖廣
厦珍簾方床炎風之燠夏日而長神昏氣蹙流汗成漿
委四肢而莫舉眊兩目其茫洋惟高枕之一覺冀煩歎
之暫忘念於爾而何負乃於吾而見殃尋頭撲面入袖
穿裳或集眉端或沿眼眶目欲瞑而或警臂或作手已疲
而猶攘於此之時孔子何由見周公於髣髴莊生安得
與蝴蝶而徜徉此其為害者一也又如峻宇高堂嘉賓
上客沽酒市脯鋪筵設席聊娛一日之餘閒奈爾衆多

之莫敵或集器皿或屯几格或醉醇酎因之沒溺或投
熱羹遂喪其魄諒雖死而不悔亦何戒夫貪得尤忌赤
頭號為景跡一有沾污人皆不食奈何引類呼朋搖頭
鼓翼聚散倏忽往來絡繹方其賓主獻酬衣冠儼飾使
吾揮手頓足改容失色於此之時王衍何暇於清談賈
誼堪為之太息此其為害者二也又如醯醢之品醬醢
之制及時月而收藏謹餅罌之固濟乃衆力以攻鑽極
百端之窺覷至於太歲肥牲嘉穀美味蓋藏稍露於罇

隙守者或時而假寐纔少怠於防嚴已輒遺其種類莫
不養息蕃滋淋漓敗壞使親朋卒至索爾以無歡臧獲
懷憂因之而得罪此其為害者三也是皆大者餘悉難
名嗚呼止棘之詩垂之六經於此見詩人之博物比興
之為精宜乎以爾刺讒人之亂國誠可嫉而可憎

律詩

秋蠅

楊廷秀

秋蠅知我正哦詩拂拂綠眉復入髭欲打羣飛還歇去

風光乞與幾多時

詩話

詠蠅以刺

熙寧初外學置官師職簡地親多在宴席有學官喜諛語同僚苦之詠蠅以刺曰衣服有時遭點染盤杯無處

不追隨

后山

詠窻上蠅

古靈見窗上蠅曰百年鑽故紙未見出頭時

蠅虎

羣書要語形似蜘蛛而色灰白善捕蠅一名蠅蝗

說大

古今事實

闕

古今文集

古詩

蠅虎

陳無已

物微趣下世不數隨力捕生得稱虎匿形注目搖兩股
卒然一擊勢莫禦十中失一八九取吻間流血腹如鼓

却行奮臂吾其武明日淮南作端午

蚊蠅

附

羣書要語秦謂之蚋楚謂之蚊

說文

丹鳥羞白鳥

夏小正歌見螢

門蚊蚋為黍民

古今注詳見蚊門

海上有蟲巢蚊睫名曰焦冥

列子蚊蚋啗膚則通宵不寐矣

莊子

詩句蚊蚋當家口草石是親情

盧仝

半夜蚊雷起西風為

解分

山谷

蚊蠅小蟲似蚋喜亂飛

爾雅

一名醯雞

莊子

因雨而生見陽

而死

列子

古今事實

開幃進蚊

齊桓公卧於柏寢謂仲父曰吾國富民殷無余憂矣一
物失所寡人悒悒今白鳥營營是必饑耳因開翠紗之
幃進之其蚊有知禮者不食公之肉而退其蚊有知足
者噉_{子立反}公之肉而退其蚊有不知足者遂長噓短吸
而食之及其飽也腹腸為之潰破

金樓子

使蚊負山

肩吾見楚狂接輿接輿曰日中何以語汝肩吾曰已出經式義定孰敢不聽而化接輿曰是欺德也其於治天下也猶涉海鑿河而使蚊負山也

莊子

聚蚊成雷

漢中山靖王朝天子置酒聞樂而泣問其故靖王對曰臣聞衆响漂山聚蚊成雷是以文王拘於羑里孔子厄於陳蔡

覆射知蟲

東方朔傳郭舍人曰願問朔一事朔得臣願榜一百朔窮臣當賜帛曰客從東方來歌謠且行不從門入踰垣牆遊戲中庭上我殿堂擊之桓桓死者攘攘格鬪而死主人被創是何物也朔曰長喙細身晝亡夜存嗜肉惡煙為掌指所捫臣朔愚戇名之曰蟲舍人詞窮當復脫禪

道術禁蚊

後漢趙炳有道術章安令惡其惑衆收殺之人爲立祠
於永康至今蚊蚋不能入

夏不驅蚊

吳猛少有孝行夏日常手不驅蚊懼其去已而噬親也

孝子
傳

碧綃蚊幃

崔祖思啓陳政事曰宋武帝節儉張妃房惟碧綃幃

海錄

未嘗有蚊

梁孫譙居身儉素牀施蘧蔭屏風夏日無幃帳而夜卧未嘗有蚊蚋

獨無蚊蚋

梁湘東王蕭澤作金樓子曰荊州高齋盛夏之月無白鳥余常寢處其中及移餘齋則聚蚊之聲如雷矣數丈之間如此之異吁可怪哉

蚊食露筋

舊傳有女子夜過高郵去郭三十里天陰蚊盛有耕夫

田舍在焉其嫂止宿女曰吾寧處死不可失節遂以蚊死其筋見焉人為立祠曰露筋廟

蚊子喫喝

歐陽公云予作憎蠅賦蠅可憎矣尤不堪蚊子自遠喫

喝來咬人也

聞見錄

道猶醢雞

係蠅螻

孔子聞老聃之言出告顏回曰丘之於道也其猶醢雞

歟

莊子

古今文集

雜著

蚋子賦

唐王周

蚋子之下有蠓子蠓子之下有浮塵子三者異乎皆狀小而黑世云巴蛇鱗介中微蟲所變耳三伏間晝飛夜息啞啄人肌膚動為瘡痂能飛不見其翼能嚙不見其口微眇之極雖縝密衣服亦可通透莊生焦螟之說近之也至微之蟲豸詩獨無蚋故作賦以廣之

蟲之至微名之曰蚋信乎蟣之別品為復蟲之餘裔羣
巢蚊之異類結搏牛之深契附諸鬱蒸產彼蕪穢張華
之識何以辨其兩翼離婁之明何以見其長喙伺暑締
之漏露萃豐肌而睥睨默然而至暗然而噬人之至靈
何闕爾之所衛人之至剛何反爾之所制狀斯咄咄顧
於造物何不恣蛇虺之毒必當與之為避何不張虎豹
之口不敢與之為忽豈其食人之膏血資已之肥腴念
膚體之何毀痛瘡痂之難沒吾將擷楸葉以為焚俾爾

之銷骨者也

古詩

蚊

孟郊

五月中夜息，饑蚊尚營營。
但將膏血求，豈覺性命輕。
顧已寧自愧，飲人以偷生。
願為天下幘，一使夜景清。

葛幘

黃魯直

飛蚊遠牀帷，來傍青燈集。
微涼忽透隙，如帶驚雷入。
念彼無幘者，中夜何嗟及。
天下同安眠，西風向秋急。

平望蚊子

吳融

天下有蚊子候夕潛人膚平望有蚊子白晝來相嚼不
避風與雨羣飛出菰蒲擾擾蔽天黑雷然隨舶艫利嘴
入人肉微形紅且濡振蓬亦不懼至死貪膏腴舟人敢
停棹陸者亦疾趨南北百餘里畏之如虎驅噫嘻天地
間萬物各有殊陽者陽為伍陰者陰為徒蚊蚋是何物
夜後喧牆隅如何正曦赫吞噬當通衢人筋為爾斷人
力為爾枯衣襟穢且甚盤饌腥有餘豈是陽德衰不能

使消除豈是有主者此鄉宜毒荼吾聞蛇能螫避之則
無虞吾聞蠱有毒見之可疾驅惟是此蚊子逢人皆病
諸江南夏景好水木多蕭疎此中震澤路風月彌清虛
前後幾來往襟懷未曾舒朝既蒙襍積夜仍跼蘊蔭雖
然好吟詠其奈難踟躕人生有不便天意當何如誰能
假羽翼直上言洪爐

憎蚊

歐陽永叔

擾擾萬類殊可憎非一族甚哉蚊之微豈足汚簡牘乾

坤量廣大善惡皆含有荒茫三五前民物交相黷禹鼎
象神姦蛟龍走潛伏周公驅猛獸人始居川陸邇來千
百年天地得清肅大患已云除細微遺不錄蠅蚋蚤蟲
蟣蜂蝎蛇蝮惟爾於其間有形纔一粟雖微無奈衆
惟小難防毒嘗聞高郵間猛虎死凌辱哀哉露筋女萬
古讎不復水鄉自宜爾可怪窮邊俗晨食下幃幬盛暑
泥駒犢我來守窮山地氣尤卑溽官閒懶所便惟睡宜
便足難堪爾類多枕席厭緣撲薰簷苦煙燼燎壁疲照

燭荒城繁草樹旱氣飛炎熇羲和驅日車當午不轉轂
清風得夕涼如赦脫囚梏埽庭露清天坐月蔭嘉木汝
寧無他時忍此見迫促翺翺伺昏黑稍稍出壁屋填窗
來若翳聚隙多可掬叢身疑陷圍聒耳如遭哭猛攘欲
張拳暗中甚飛鏃手足不自救其能營背腹盤飡勞扇
拂立寐僵僮僕端然窮百計還坐瞑雙目於吾誠不較
在爾誠為酷誰能推物理無乃乖人欲騶虞鳳凰麟千
載不一矚思之不可見惡者無由逐

江上蚊子

韋楚老

搖俠翅亞紅腹江邊夜起如雷哭請問貪婪一點心腐
肉填腹幾多足越女如花住江曲寒蛾夜夜疑雙綠任
君撩亂錦窗中十幅輕綃圍夜玉

聚蚊謠

劉禹錫

沈沈夏日空堂開飛蚊伺暗聲如雷嘈然倏起初駭聽
殷殷若自南山來喧騰鼓舞喜昏黑昧者不分聰者惑
露花滴瀝月上天利嘴迎人看不得我軀七尺爾如芒

我孤爾衆能我傷天生有時不可遏為爾設幄潛匡牀
清商一來秋日曉羞爾微形飼丹鳥

律詩

蚊公監泰州西溪鹽場地多蚊蚋

范希文

飽去櫻桃重饑來柳絮輕但知求旦暮休更問前程

蝨蚤附

羣書要語蝨啣人蟲也蟣蟲子也說文湯沐具而蟣蟲相

弔

淮南子

甲冑生蟣蟲

韓子

頭蝨著身皆稍變而白身蝨處

頭皆漸化而黑

抱朴子

似衣中蝨必須掐之

三國典梁書

搏牛

之蝨不可以破蝨

漢書

詩句地下蟣蝨臣

盧全

蝨聞湯沸尚血食

山谷

蚤嚙人跳蟲也

說文

得蚤者磨之齒牙為害身也

曹植論

蚤

蝨羣攻卧不獲安

抱朴子

以新室吞勾奴無異口中蚤蝨

漢書

古今事實

學射貫蝨

紀昌學射於飛衛使學視小如大紀昌以甕懸蝨於牖南面而望之二年之後如車輪焉以觀餘物皆丘山也乃以燕角之弧弧蓬之簫射之貫蝨之心而懸不絕以告飛衛衛曰汝得之矣

頭蝨必剃

馬援擊尋陽山賊上書曰除其竹木譬如嬰兒頭多蟣蝨而剃之蕩蕩然蟣蝨無所復依書奏上大悅因出小

黃門頭有蝨者皆剃之

東觀漢記

捫蝨論事

王猛隱居華山懷佐世之念桓溫入關猛被縕袍而詣之面談當世之事捫蝨而言旁若無人溫察而異之

多蝨不堪

嵇康與山濤書危坐一時痺不得搖性復多蝨爬搔無已而常裹以章服揖拜上官三不堪也

擇蝨夷然

晉顧和王導辟為揚州從事月旦當朝未入停車門外

周顓過之和方擇蟲夷然不動顓指和心曰此中何所

有和徐應曰此中最是難測地

語林

不忍蟲饑

齊江泌性仁義衣敝蟲多綿裏置壁上恐蟲饑死乃復置衣中後終身無蟲

對客覓蟲

北齊邢子才位中書監脫畧簡易不修威儀有齋不居坐卧常在一小屋菓餌之屬置之梁上賓至下而共噉

對客或解衣覓蟲且與劇談

親為擇蟲

司馬子如為大行臺及文襄輔政見之哀其憔悴以股承其首親為擇蟲賜酒百瓶羊五百口粳米五百石子如曰無事尚被囚幾死若受此豈有生路耶

北史

衲衣養蟲

查道性淳古少寓狼山寺躬事薪水以給僧衆衲衣不洗濯以養蟲後仕至龍圖閣待制

國老聞談

撲殺佛子

無畏三藏飲酒食肉言行粗易律師不悅常令宿於戶外律師中夜捫蝨投牀下無畏即呼曰撲殺佛子律師

異之

鄭榮傳
信記

殺蚤不誠

以下
係蚤

韓昭侯搔而痒亡一蚤求之甚急左右因取其蚤蝨而殺之昭侯以此察左右不誠也

韓子

探蚤不停

齊卞士蔚居貧多病縈寢敗絮澡刷不謹澣沐不時四體氈氈加以臭穢故葦席蓬纓之間採採蚤蠹日不替

手

自作賦序

託蚤指斥

齊卞彬為南康郡丞仕既不遂及著蚤蠹蝸蟲蝦蟇等賦皆大有指斥

古今文集

雜著

大人先生傳

阮籍

其畧曰世之所謂君子惟法是修惟禮是克手執圭璧
足履繩墨行欲為目前檢言欲為無窮則少稱鄉黨長
聞鄰國上欲圖三公下不失九州汝獨不見羣蟲之處
禪中逃乎深縫匿乎壞絮自以為吉宅也行不敢離縫
際動不敢出禪襠自以為得繩墨也然炎丘火流焦城
熾都羣蟲處於禪中而不能出也君子之處域內何異
夫蟲之處禪中乎此亦籍之胸懷本趣也

蝨賦

李商隱

亦氣而孕亦卵而成晨驚露鶴不知其生汝職惟嚙而
不善嚙因臭而多妒香而絕

後蝨賦

陸龜蒙

余讀玉溪生蝨賦有就顏避妒之歎似未知蝨作後賦
以矯之君子居貞衣緇守白髮華守黑不為物遷是有
恒德小人趨時必變顏色棄瘠涵腴乃蝨之賊

古詩

和王樂道烘蟲

王介甫

秋暑汗流如炙輶敝衣蒸濕塵土沍施之衆蟲當此時
擇肉甘如虎狼餓咀嚼侵膚未云已爬搔刺骨終無那
時時對客輒自捫十百所除纔幾箇皮毛得氣強復活
爪甲流丹真暫破未能湯沐取一空且以火攻令少挫
踞爐熾炭已不暇對竈張衣誠未過飄零乍若蛾赴燈
驚擾端如蟻旋磨欲毆百惡死焦灼肯貸一凶生棄播
已觀細黠無所容未放老姦終不墮然臍郛塢患溢世

焚寶鹿臺身易貨冢中燎入化秦屍池上掀隨遷莽坐
彼皆勢極就煙埃況汝命輕伴涕唾逃藏壞絮尚欲索
埋沒沈灰誰復課熏心得禍爾莫悔爛額收功吾可賀
猶殘衆蟻恨未除自許寧能久安卧

和介甫烘蟲

司馬君實

天生萬物名品夥嗟爾為生至么麼依人自活反食人
性喜伏藏便垢泥晨朝生子暮生孫不日蕃滋踰萬箇
透疎緣隙巧百端通夕爬搔不能卧我歸彼出疲奔命

備北警南歔搜邏所禽至少所失多捨置薰燒無術奈
加之炭上猶晏然相顧未知亡族禍大者洋洋迷所適
奔來未停身已墮細者懦怯但深潛乾死縫中誰復課
黑者抱髮可憂疑逃入縹頭默相賀腥煙焰起遠襲人
袖擁鼻端時一唾初雖快意終自咎致爾殲夷非爾過
吾家篋笥本自貧况復為人苦慵惰體生鱗甲未能浴
衣不離身成脆破朽繒壞絮為淵藪如粟如麻寢肥大
虛腸不免須侵入肯學夷齊甘死餓醯酸蚋聚理固然

爾輩披攘我當坐但以努力自潔清羣蟲皆當遠遁播

蠹

蠹書
魚附

羣書要語蝸蛄蝨木中蠹蟲也

爾雅

蟬淫白魚也注衣書中蠹蟲也

爾雅

獻桂蠹

文帝賜尉佗書衣物佗因使者獻桂蠹一器

漢書

桂蠹紫

色香辛有味噉之去陰痰之疾

大業拾遺錄

芸香辟蠹

見藏書門

古今文集

雜著

蠹化

陸龜蒙

橘之蠹大如小指首負特角身蹙蹙然類蝨蟻而青翳
葉仰啣饑蠹之速不相上下人或振觸之輒奮角而怒
氣色桀驁一旦視之凝然弗食弗動明日復往則蛻為
蝴蝶矣力力拘拘其翎未舒襟黑韞蒼分朱間黃腹瑱
而脣墮綏纖且長久醉方悟羸枝不揚又明日往則佹

薄風露攀緣草樹聳空翅輕翮然而去或隱蕙隙或留
篁端翩旋軒虛颺曳紛拂甚可愛也須臾犯螫網而膠
之引絲環纏牢若拳拮人雖甚憐不可解而縱矣噫秀
其外類有文也默其聲類有德也不朋而遊類潔也無
嗜而食類廉也向使前不知為橘之蠹後不見觸螫之
網人謂之釣天帝居而來今復遇矣天下大橘也名位
大羽化也封略大蕙篁也苟滅德忘公崇浮飾傲榮其
外而枯其內害其本而窒其源得不為大螫網而膠之

乎觀吾之蠹化者可以惕之

律詩

係蠹書魚

詠壁魚

李遠

鱗細粉光鮮開書亂眼前透窗疑漏網落硯似流泉潛
穴河淵內吞鈎乙字邊莫言髻鬣小食盡白蘋篇

古今事文類聚後集卷四十九

欽定四庫全書

古今事文類聚後集卷五十

宋 祝穆 撰

蟲豸類

蜘蛛

羣書要語

龍龜蚤

音土蜘蛛

在地中布網

草蜘蛛

絡幕草間

蠙蛸

長跼

長脚者俗呼為小蟾子

有在器下有以絲於籬落間緣壁捕

蠅者

廣志

長跼河內人謂之蟾母著人衣當有親客至

詩疏

蟪蛄在戶

山東

獨星懸於浮處遂設網於四隅

晉成公綏賦

詩句玉臺生網絲

江淹

蜘蛛網四屋

張景陽

蛛絲冒鬚長

杜

網蟲垂戶織

選

絲窠歸還成

韓

古今事實

効蛛結網

湯出見羅者湯下車命解其三面而置其一面更教之

祝曰昔蛛蝥作網令人學結欲左者左欲右者右欲高

者高欲下者下吾取其犯命者

世紀

布網執豸

晉公子重耳奔齊與五臣游乎大澤之中蜘蛛布網曳繩執豸而食之公子重耳乃撫僕之手駐駟而觀之顧其臣咎犯曰此蟲也智之薄者矣猶役其智布其網曳其繩執豸而食之況乎人之有智而不能廓垂天之網布絡地之繩以供方丈之御是曾不如蜘蛛之智孰可謂之人乎咎犯曰公子慎勿言也君終行之則有邦有

嗣也

符子

蜘蛛占喜

樊噲問陸賈自古帝王人君皆云受命於天謂有瑞應
豈然乎賈曰有之夫目矐得酒食火化得錢財乾鵲噪
而行人至蜘蛛集而百事喜小故猶徵大亦宜然故目
矐則矐之鵲噪則餒之蜘蛛集則放之况天下大寶人
君非天命何以得之

西京雜記

號蜘蛛隱

楚國龔舍初隨楚王朝宿未央宮見蜘蛛焉有赤蜘蛛

大如粟四面縈羅網有蟲觸之而死者退而不能得出
焉舍乃歎曰吾生亦如是爾仕宦者人之網羅也豈可
淹歲於是挂冠而退時人笑之謂舍為蜘蛛之隱

金樓子

蛛網必毀

王守一自稱終南山人布衣賣藥於洛陽市嘗攜一拄
杖每見蛛網必以杖毀裂盡淨而後已或問之曰天地
之間飛走之屬捕逐搏拏固非一物均是為口腹以養
性命獨蜘蛛結網張羅設機巧以害物吾是以惡之

勝非

錄

蜂螫蜘蛛

處士劉易隱居王屋山嘗於齋中見一大蜂冒於蛛網
蛛搏之為蜂所螫墜地俄頃蛛鼓腹欲裂徐行入草味
啣芋梗微破以瘡就啣處磨之良久腹漸消輕躁如故
自後人有為蜂螫者按芋梗傳之則愈

筆談

古今文集

雜著

喜徵論

李德裕

陸賈稱螭子垂而百事喜不徵其故何也凡人將有喜
兆必垂於冠冕余嘗思之蓋以人肖圓方之形稟五行
之氣有生之最靈者也如景如火忽有歆然感氣發於
圓首之上其榮盛也如陽氣發生烟燭涵照其變衰也
如秋氣索然寂寞沈痺雖不能目睹其鑒明者必可察
之唐舉許負疑用此術所以望表而知窮達何以明之
淑春愛景必有螭子垂於簷楹之間室有明燭膏燼必

垂於屏幃之際喜氣將盛故集於冠冕之上以此推之
無所逃也

秋蟲賦

并序

羅隱

秋蟲蜘蛛也致身羅網間實腹亦羅網間愚感其理有
得喪因以賦之物之小兮迎網而斃物之大兮兼網而
逝網也者繩其小而不繩其大吾不爾身之危兮腹之
餒兮吁

蜘蛛賦

張文潛

魚遊假淵鳥棲求木而我所宅獨取諸腹巢於牆屋人
不予取朝蠅暮蚊食人所惡彼殘物所養而無益於世
雖名人兮斯蟲是愧

古詩

詠蜘蛛

梅聖俞

日結一尺網知吐幾尺絲百蟲為爾食九腹尚苦饑

蜘蛛諷

孟郊

萬類皆有性各各稟天和蠶身與汝身汝身何太訛蠶

身不為己汝身不為他蠶絲為衣裳汝絲為網羅濟物
幾無功害物日已多百蟲雖切恨其將奈爾何

蜘蛛諭

蘓拯

春蠶吐出絲濟世功不絕蜘蛛吐出絲飛蟲成聚血蠶
絲何專利爾絲何專孽映日張網羅遮天亦可別倘居
要地門害物可堪說網成雖福已網敗還禍爾小人與
君子利害一如此

蠶蛛行

張芸叟

誰謂爾蠶巧謀身一何疎斯民患寒冽爾為裳與襦斯
民患裸體爾使曳且婁餘事及土木自庇一縷無彼蛛
豈無絲結網緣庭除朝昏伺羣飛所得充膏腴反顧爾
蠶笑容容乃良圖如爾為民患不自愛其軀屈原於國
智晁錯於身愚石顯以佞寵望之以讒誅須知磊落人
死耳不為蛛

律詩

絕句

來鵠

寂寞閒階草亂生
簾涼風動若為情
不知獨坐閒多少
看得蜘蛛結網成

省中

王介甫

萬事悠悠心自知
強顏於世轉參差
移牀獨向秋風裏
卧看蜘蛛結網絲

田中雜詠

范至能

靜看簷蛛結網低
無端妨礙小蟲飛
蜻蜓倒挂蜂兒窘
催喚山童為解圍

觀簷間蜘蛛

楊廷秀

蜘蛛作網祇愁疎密了還遭小雨餘漏却飛蟲渾細事
無妨網得萬真珠

觀雨中蛛絲

五首

楊廷秀

雨打蛛絲不打蛛雨來蛛入畫簷隅網羅滿腹輸渠巧
也只蠅蚊命屬渠雨罷蜘蛛却出簷網絲小減再新
添莫言辛苦無功業便有飛蟲密處粘空中仰面却
翻身寂似毘耶不動尊忽有一蚊來觸網手忙脚亂便

星奔走得團團織得窠羣飛來往不逃他網羅外面
逃多少枉了辛勤設網羅網羅最密是蛛絲却被秋
蚊望得知粘着便飛來不再蛛絲也解有疎時

戲題簷間蜘蛛

楊廷秀

屋角籬尖竹樹陰可憐用盡許機心凝身不動如無物
頓網輕搖試有禽絲貫日華明五色戲隨風舞忽千尋
看渠經緯來還去忘却摧頽立不禁

詩話

詠蛛譏刺

翟嗣宗尉臨淮頗為監司所窘遂於臨淮館驛題蜘蛛
詩云纖絲來往疾如梭長愛騰空作網羅害物身心雖
甚小謾天網紀亦無多林間宿鳥應嫌汝簾下飛蟲最
懼他莫學螳螂捕蟬勇須知黃雀奈君何林子中時為
發運使過而見之召而誚責且戒無為浮薄

復齋
謾錄

蛙

蟾蜍
附

羣書要語一名蝦蟆亦曰蛤

說文

蠡山湖水東流其中多

活即師注科斗也

山海經

一名活東

爾雅

一名田雞又曰水

雞

見詩話

蚪蚪蝦蟆子也形圓有尾聞雷震則尾脫脚生

崔豹古今注

百越人以蝦蟆為上味疥者皮最佳故越人云

不可脫去此乃錦襖子

尚書故實

蠋氏掌去鼃黽焚牡鞠以

灰灑之則死

秋官

老蝦蟆化為鴉

淮南子注

指蝦蟆使舞皆應

弦節

神仙傳

世言蝦蟆蜈蚣蛇三物相值皆不動彼此畏

食也

坡詩注

詩句蛙鼃鳴無謂閤閤祇亂人

韓

田家推五行水旱卜

蛙聲

章孝標

廢沼蛙蠲淫

坡

半夜青蛙聖得知

韓盆池

一夜

青蛙鳴到曉

韓

蟾蜍三足蝦蟆也

說文

銳頭幡腹

東方朔蟾蜍賦

稱其異則畫地

成川語其神則登天八月

同上

古今事實

埶井蛙

公孫龍問於魏牟曰龍少學先生之道合同異離堅白自以為至達今聞莊子之言茫然異之敢問其方公子

年隱几太息仰天而笑曰子獨不聞夫埴井之蛙乎謂
東海鼃曰吾樂與吾跳梁乎井幹之上入伏乎缺甃之
崖赴水則接腋持頤蹶泥則沒足滅跗還蚌蟹與蝌蚪
莫吾能若也且夫擅一壑之水而跨時埴井之樂此亦
至矣夫子奚不時來入觀乎東海之鼃左足未入而右
膝已紮矣於是逡巡而却告之海曰夫千里之遠不足
以舉其大千仞之高不足以極其深禹之時十年九潦
而水弗為加益湯之時八年七旱而崖不為加損夫不

為頃久推移不以多少進退者此亦東海之大樂也於是埴井之蛙聞之適適然驚規規然自失也且夫知不知是非之竟而猶欲觀於莊子之言是猶使蚊負山商炬馳河也必不勝任矣

秋水篇

式怒蛙

越王屢伐吳欲人之輕死也出見怒蛙乃為之式從者曰奚敬於此曰為其有氣故也

韓非子

沈竈生蛙

趙襄子以尹鐸有寬政於晉陽其民心必和乃守晉陽後
晉師圍而灌之沈竈生蛙民無叛意

拾塼投蛙

燕太子丹自喜得荆軻永無秦憂日與軻之東宮臨池
而觀軻拾塼投蛙太子令人奉金丸進之

史記

問蛙喜怒

艾子使於燕燕王曰吾小國也日為強秦所侵徵求無
已吾國貧無以供之欲并兵一戰又力弱不足以拒敵

如之何則可先生其為謀之艾子曰亦有分也王曰其
有說乎艾子曰昔有龍王逢一蛙於海濱相問訊後蛙
問龍王曰王之居處如何王曰珠宮貝闕翬飛璇題龍
復問汝之居何若蛙曰綠苔碧草清泉白石復問曰王
之喜怒如何龍曰吾喜則時降膏澤使五穀豐稔怒則
先之以暴風繼之以飛電使千里之內寸草不留龍問
蛙曰汝之喜怒何如曰吾之喜則清風明月一部鼓吹
怒則先之以努眼次之以腹脹然至於脹過而休於是

燕王有慙色

蝦蟆無尾

父子浮於海夜泊島嶼中夜聞水下有人哭聲復若人言遂聽之其言曰昨日龍王有令應水族有尾者斬吾輩也故懼誅而哭汝蝦蟆無尾何哭復聞有言曰吾今幸無尾便恐更理會蝌蚪時事也

蛙蝦蟆鬪

漢武帝元鼎五年秋蛙與蝦蟆鬪是歲四月將軍衆十

萬征南越開九郡

長安食蛙

武帝欲籍阿城以南蓋屋以東宜春以西為上林苑東
方朔諫以謂此地土宜姜芋水多蛙魚貧者得以人給
家足無饑寒之憂

朔傳

井底蛙

公孫述稱帝於蜀隗囂使馬援往觀之援素與述同里
閤相善以為既至當握手歡如平生而述盛陳陞衛以

延援入欲授援以封侯賓客皆樂留援曉之曰公孫不吐哺走迎國士反修飾邊幅如偶人形何足久稽天下士乎因辭歸謂蹢曰子陽井底蛙耳而妄自尊大

鳴為官私

晉惠帝在華林園聞蝦蟆聲問左右曰此鳴者為官乎為私乎侍中賈脩對曰在官地為官在私地為私

能禁蛙鳴

梁沈僧照別名法郎少事天師道士後為山陰令時武

陵王純為會稽宴集池亭蛙鳴聒耳王曰殊廢絲竹之
聽僧照呪厭便息日晚王欲其復鳴僧照曰王歡已闌
令汝恣鳴即喧聒

兩部鼓吹

齊孔珪字德璋為都官尚書不樂門庭之內草萊不剪
中有蛙鳴或曰欲為陳蕃乎珪曰我以此當兩部鼓吹
何必效陳蕃王晏鳴鼓候之聞羣蛙鳴曰此殊聒人耳
珪曰我聽鼓吹殆不及此晏慙

遇蝦蟆毒

丘傑年十四遭母喪以熟菜有味不嘗於口歲餘忽夢
母曰汝噉生菜遇蝦蟆毒靈床前有三丸藥可取服之
傑驚起果得甌中藥服之下蝌蚪子數升

南史

作賦寓刺

齊卞彬著蝦蟆賦云紆青拖紫名為蛤魚世謂比令僕
也又云蝌蚪唯唯羣浮閭水惟朝繼夕聿役如鬼比令
史諸事也

綠衣乞命

某朝皇帝尚食將供蝦蟆充御膳上忽夢綠衣人數百乞貸命後方悟其為蝦蟆因禁採捕或云蝦蟆能食蝗

蟲故禁採捕

此事不記何書當考

蟾蜍入月

係蟾蜍見月門

蝦蟆蝕月

見月蝕門

古今文集

雜著

鳴蛙賦

并序

張文潛

余寓山陽學舍夏大雨屋四隅成塘聚蛙以千計聲鳴不絕夜為不能寐客有獻余以殺蛙之術曰投余藥一丸蛙無類矣童子將用之余曰不可復為賦示之

夏雨初止積潦過尺有蛙百千更跳互出幸此新霽夜月清溢我勞其休歸偃於室於時蛙鳴若啼若訴若歌若歡若悲若喜而語若怒而詬若噦而嘔若咽而噉瘡者之呼吃者之鬬或急或緩或清或濁若羌絲野鼓雜

亂無節兮又似夫蠻歌獠語詭怪之迭作也爾其困於
泥潦失其處所而悲又若夫旱暵既久得其所處而樂
也爰有童子持燭來謁曰蛙羣夜鳴君寢其聒考之周
官灑灰驅蛤君其教之余得盡殺余語童子爾無是酷
爾樂而歌而哀則哭哭則悲嗟樂有聲曲聚語羣爭引
吭而呼一日之間不寧須臾蛙不汝嫌汝奚蛙誅萬物
一府誰好孰惡爾欺自私已厚蛙薄參適彼已樂我自
然弭爾怒心置燭而眠夜半張子援枕而吁顧謂童子

記余言歟前言既啟請卒其說物各有時夫誰敢過爾觀夫春露初靄朝華始敷文羽清喙飛鳴自如若奏琴箏而和笙竽清耳悅心聽者為娛及夫陽春既徂炎火將極惡葦蕃遮淫潦瀦積蛙於此時生養蕃息跳梁號呼意氣橫逆子如之何時不可逆時乎時乎美惡皆然當其盛時誰得而榮及其霜雪既降木實草衰飛蠅聚蚊孽無所施於是蛙斂吻收足阨然土中一聲不出黨散巢披不可終日盛不可常與衰迭來子姑忍之奚以殺

為哉

怒蛙說

陳君舉

日有烏月有蛙蛙與烏相遇烏戲蛙曰若齧肉耳躍之
高不咫尺焉能為哉蛙曰吾已矣若無靳我烏曰若亦
能怒耶蛙曰吾翹吾腹翳太陰之光呀吾頤啗其壤瞠
吾目列星不敢輝奚而不能怒若不吾信月於望吾怒
以示若其望果無光他日蛙遇烏曰曩吾怒得無惕乎
烏曰若焉能惕我哉吾振吾羽翳太陽之光肆吾味啄

其壤徐以三足蹴之天下不敢寧而居吾視若之怒眇
矣奚以若惕為若不吾信日於朔吾怒以示若其朔日
果無光嗇人伐鼓馳且走焉又他日烏遇蛙曰吾怒也
何如蛙曰始吾謂極威矣而不知子之威震於我也日
之馭曰羲和傍聞之曰噫何謂威吾疾其驅六龍不敢
稽其輶吾赫其燥雲不敢雲雨不敢雨風不敢風八土
之埏吾能赫其膚萬壑之陰吾能充其毛百川之流吾
能杜其液且彼與若敢言怒哉若不吾信吾怒以示若

於是果早暝者半載凡天地之間病之他日義和遇烏
曰吾怒也何如烏赧然曰始吾謂極威矣而不知子之
震於我也飛廉豐隆屏翳者聞之相與造義和誚焉曰
若驚而怒耶曰吾威示若吾三人焉噓其氣足以幕乾
坤之倪噤吾味足以赭崧華之峯嘯吾聲足以簸四海
掀九州而覆之也時也若烏能威言未既豐隆噓焉屏
翳噤焉飛廉嘯焉莫晝莫夜彌山漫谷者亦半載嗚呼
竊造化之權而私以怒競民物奚罪哉

古詩

蝦蟆

白居易

嘉魚薦宗廟靈龜貢邦家應龍能致雨潤我百穀芽蠹
蠹水族中無用者蝦蟆形穢肌肉腥出沒於泥沙六月
七月交時雨正霽霓蝦蟆得其志快樂無以加地既蕃
其生使之族類多天又與其聲得以相喧譁豈惟西池
上汙君清冷波可獨瑤瑟前亂君鹿鳴歌常恐飛上天
跳躍隨姮娥往往蝕明月遣君無奈何

答柳柳州食蝦蟆

韓愈

蝦蟆水中居水特變形貌強號為蛙蛤於實無所校雖然兩股長其奈背瘠跳躑雖云高意不離潭淖鳴聲相呼和無理祇取鬧周公所不堪灑灰垂典教我棄愁海濱常願眠不覺叵堪朋類多沸耳作驚爆端能敗笙磬仍工亂學校雖蒙勾踐禮竟不聞報効大戰元鼎年孰強孰敗撓居然當鼎味豈不辱鈞罩余初不下喉近亦能稍稍常懼染蠻夷平生性不樂而君復何為甘食

比秦豹獵較務同俗全身斯為孝哀哉思慮深未見許
迴權

學韓退之體賦蝦蟆一篇

洪駒父

吾廬逼沮如蛙蛤宗生之委委見蚪蚪閣閣已在茲夜
聲一何喧達旦乃寢微月令紀螻蛄語默亦有時豈伊
不平鳴嗒嗒竟何為那復當鼓吹安能問官私吾聞崑
崙下厥大數十圍蟾蜍窟望舒色勝金裊蹄癡駭反食
月吞吐誰能知坎井我自足跳梁而持頤驚笑色無愠

鵲化理莫推疥體不自惜或以調鹽醢柳州味南烹下
飭甘若飴在昔薦宗廟乃與羔兔齊擅減幾被坐巨細
不可遺莫以腥臊棄終將瑚璉期

藏之和予蝦蟆短調再作之因以策事

洪駒父

蝦蟆何為者疠磊益於背人言懷土蟲棄去俄復在昔
有係青繒酉陽志其怪嘗觀三物圖副以唧蛆帶相持
莫先動含毒相屠膾端欲兄龜龍未肯弟孔翠俳語解

人頤子陽妄尊大慎勿離窟穴旁午凡五輩東行犯日
忌束縛非其罪倘有切玉刀甘心脂鼎萬平生不下筋
實憚背脊疥何必食馬肝前修有明戒願君勿嘲誚微
命其可貸

再和一首

洪駒父

動物類含血蝦蟆獨無之雙目但睜也一腹亦瞤其龍
變或託體魚服覩幽姿罕見三足蟾詎減六眸龜向來
奏屨瑞背負輪囷芝坐謾皆下吏膠車等兒嬉雖蒙黃

金擲荆卿空爾為或以白玉琢形模妙工僂咄爾百醜
質詎辱五鼎脂浪號土底鴨雄誇水中雞何足汙帝箸
但可充蛇饑作意一池鳴和我五字詩

初聞蛙

梅聖俞

朝開南籬梅暮聞北池蛙何時蚪蚪生草根已吐芽只
畏草葉長其下可隱蛇游子且勿行蚪蚪成蝦蟆

蝦蟆

蘇子瞻

悍目知誰瞋瞋腹空自脹慎勿困蜈蚣饑蛇不汝放

律詩

池蛙

宋子京

越國車前矜勇甚，子陽井底太驕生。
乘時不羨雲溟樂，

口作儀同鼓吹聲。

齊張狗兒將拜儀同口自作鼓吹聲

聞蛙

朱元晦

兩蛙盛怒鬪春池，羣吠同聲徹曉帷。
等是一場狼籍去，更無人與問公私。

和聞蛙

楊廷秀

春來真底好此輩政縱橫身作泥中計聲從雨後增北人食未慣南食眼猶生灰灑知虛實於渠似可行

蚯蚓

羣書要語

螻蛄切元引

蚓即蜚蠊也

爾雅

蜚蠊蚯蚓也

高談注

白頸

蚯蚓是其老大者一名土龍一名螻蛄

本草

一名曲蟮

古今

注孟夏蚯蚓出冬至之日蚯蚓結

月令

夫蚓上食槁壤下

飲黃泉

孟子

古今事實

黃帝螾瑞

黃帝時螾大如虹

世紀

黃帝時見大螾土氣勝故其色尚

黃

呂氏春秋

螾兆隋亡

陳後主時隋軍至江
螾盡出森然如植箭
陳氏水鄉
螾土蟲象陳氏自稱
土德盡出明傾其窟
穴以曲歸

直是歲隋平陳

廣五行記

地多胸臆

唐以開州盛山郡地多胸臆蟲

也 蚯 蚓

改為胸臆郡

古今文集

雜著

蚯蚓賦

東方虬

惟陰陽之播氣實萬類以呈形有微蟲之稟質應甲子而濕生雨欲垂而乃見暑既至而先鳴乍逶迤而鱗屈或宛轉而蛇行內乏筋骨外無手足任性行止物擊便曲徒進退而皓首竟不知其所欲東西詰屈南北黃緣

上食塵塊下飲淵泉應軒轅土德之王入蔡邕勸學之篇其體至微其用甚專堦泥塗以自保觸監滋而罔全豈造化之賦命信歸之於自然

雜記

歐陽永叔

蚓食土而飲泉其為生也簡而易足然仰其穴而鳴若號若呼若嘯若歌其亦有所求耶抑其求易足而自鳴其樂耶其生之陋而自悲其不幸耶將自喜其聲而鳴其類耶豈其時至氣作不自知其所以然而不能自止

者耶何其聒然而不止耶吾於是乎有感

蜥蜴虎守
宮同

羣書要語蝾螈蜥蜴蠃蚌守宮也

爾雅

一名蛇鑿

詩疏

在壁

曰蠃蚌在草曰蜥蜴或稱蜥虎

說文

蠃蚌一曰守宮一曰

龍子善於樹上捕蟬食之其長細五色者名為蜥蜴其

短大者名為蝾螈一曰蛇鑿大者長三尺其色玄紺善

魅人

月令記

大能鳴者謂之蛤蚧

方言

哀今之人胡為虺蜴

詩正

月

古今事實

蜥蜴求雨

甕盛蛇豎

並見祈雨門

覆射守宮

見覆射門

守宮飾女臂

取守宮牝牡各一藏之甕中陰乾百日以飾女臂則生

文章與男子合陰陽輒滅去

淮南萬畢術

一說取蜥蜴以器

養之食以硃砂體盡赤擣萬杵以點女人肢體終身不

滅若與男合則滅故曰守宮

博物志

古今文集

古詩

蝟虎

蘇子瞻

跂跂有足蛇脉脉無角龍為虎君勿笑食盡萬尾蟲

蝟牛

天水牛附

羣書要語蝟羸蛻蝟

音移吏

注即蝟牛也

爾雅

背負圓殼者

曰蝟牛無殼者曰蝟蝟

說文

詩句蝸涎蠹畫梁

杜牧之

斷牆着雨蝸成字

歐

天水牛皂角木五六月多大黑甲蟲俗呼為天水牛

遯齋閒覽

古今事實

蠻觸交戰

有國於蝸之左角曰蠻氏右角曰觸氏爭地而戰伏尸

數萬遂比旬有五日而後反

莊子

蝸牛廬

見宅舍門

古今文集

古詩

蝸牛

蘇子瞻

腥涎不滿腹聊足以自濡升高不知休竟作粘壁枯

天水牛

蘇子瞻

兩角徒自長空飛不服箱為牛竟何事利吻穴枯桑

羣蟲

羣書要語有足謂之蟲無足謂之豸

爾雅

仲春蟄蟲咸動

仲秋蟄蟲坏戶

月令

嚶嚶草蟲趯趯阜螽

周南

蟲飛薨薨

齊雞鳴

秋蟲響於廊宇

曹子建秋興賦

夕草起寒螿之愁

同上

百蟲

吟暮兮萬葉吟秋

劉禹錫秋聲賦

以蟲鳴秋

韓文

詩句竹蟲音亂堦

梁蕭子範

柳老半書蟲

坡

夜雨鳴寒蛩

露草濕寒蛩

并后山

青蟲相對吐青絲

唐詩

秋風淅瀝鳴清

商秋草未死啼寒螿

朱文公

蜻蜓赤弁丈人

古今注

詩句蜻蜓立釣絲

杜

點水蜻蜓款款飛

杜

風蒲獵獵弄

輕柔欲立蜻蜓不自由

參寥

池面蜻蜓去復來

唐詩

無數蜻

蜓齊上下

杜

古今事實

闕

古今文集

古詩

莎雞

張文潛

金風肇殘暑玉樹生秋涼
嚶嚶草間蟲感時振衣裳
楚客萬里思夜吟怨藜床
勞勞終夕語共此簷月光
孤輪曳獨繭折管韻哀簧
辛苦幽父兄無衣畏風霜

律詩

聞蛩

陳無已

晚風庭竹已秋聲
初聽空堦蛩夜鳴
流落天涯聊自得
今宵惟爾感平生

秋蟲


楊廷秀

蟬依落日恰纔收
蛩怨黃昏正未休
催促世人頭總白
不知替得二蟲愁

蜻蜓

韓偓

碧玉眼睛雲母翅輕於粉蝶瘦於蜂坐來近拂波光舞
又是慇懃為蓼叢



古今事文類聚後集卷五十